

Na osnovu člana 16. stav 1. Zakona o Vladi Zeničko-dobojskog kantona (Prečišćeni tekst („Službene novine Zeničko-dobojskog kantona,“ broj 7/10), Vlada Zeničko-dobojskog kantona, na 176. sjednici održanoj dana 08.08.2014. godine, d o n o s i

U R E D B U **o reprezentaciji i poklonima**

DIO I-OPĆE ODREDBE

Član 1. **(Predmet Uredbe)**

Ovom uredbom uređuje se visina sredstava reprezentacije, korištenje sredstava reprezentacije, procedura i pravila primanja i davanja poklona i vođenje evidencije o primljenim poklonima u kantonalnim organima uprave, upravnim organizacijama, uredima i službama (u daljnjem tekstu: kantonalni organi uprave), te kod svih ostalih budžetskih korisnika koji su kao takvi definisani budžetom Kantona za svaku fiskalnu godinu.

Član 2. **(Pojam reprezentacije i poklona)**

U smislu ove uredbe sljedeći izrazi imaju značenje:

- a) Reprezentacija je izdatak koji se javlja u toku redovnog poslovanja kantonalnih organa uprave, sa ciljem ostvarenja i održavanja poslovnih odnosa, te obilježavanja godišnjica i drugih značajnih događaja,
- b) Sredstva za reprezentaciju su sredstva za troškove: jela, pića i osvježenja koja se služe tokom radnih sastanaka, karte za sportske i kulturne događaje, troškovi za kupovinu cvijeća i vijenaca i druge robe, usluge smještaja u smještajnim objektima i druge usluge,
- c) Eksterna reprezentacija podrazumijeva korištenje ugostiteljskih usluga u zemlji i inostranstvu od strane kantonalnih organa uprave van službenih prostorija organa ili u službenim prostorijama organa kada se radi o organizaciji svečanih prijema, poslovnih sastanaka i drugih događaja,
- d) Interna reprezentacija podrazumijeva korištenje sredstava za reprezentaciju za ugostiteljske usluge koje pruža Služba za zajedničke poslove za tople napitke i bezalkoholna pića.
- e) Poklonom se smatra lična korist u vezi vršenja javne funkcije, a podrazumijeva stvari, prava, usluge bez naknade, te neku drugu osobnu korist datu nosiocu izvršne funkcije ili savjetniku, kao i svaku isplatu, djelovanje, uslugu ili predmet od vrijednosti učinjene izravno primaocu, bez naknade ili očekivane naknade.
- f) Institucije i organizacije su državne institucije i organizacije Bosne i Hercegovine, entiteta, drugih kantona, općine i Brčko Distrikta Bosne i Hercegovine, državne institucije drugih država, te međunarodne organizacije i institucije.

DIO II-VISINA SREDSTAVA REPREZENTACIJE I POKLONA

Član 3. **(Određivanje visine reprezentacije)**

(1) Visinu reprezentacije za kantonalna ministarstva i druga tijela kantonalne uprave utvrđuje Vlada Kantona posebnom odlukom, u skladu sa budžetom i raspoloživim budžetskim sredstvima, posebno za svaku budžetsku godinu.

(2) Visinu reprezentacije za budžetske korisnike iz oblasti osnovnog, srednjeg i visokog obrazovanja određuje ministar obrazovanja, nauke, kulture i sporta posebnom odlukom, u skladu sa usvojenim budžetom i raspoloživim budžetskim sredstvima, posebno za svaku budžetsku godinu.

Član 4.

(Najviši iznos sredstava na godišnjem nivou)

Rashodi na ime reprezentacije i poklona mogu se izvršiti najviše do ukupnog iznosa koji je utvrđen odlukom iz člana 3. ove odluke za godinu u kojoj se koristi.

DIO III-KORIŠTENJE SREDSTAVA REPREZENTACIJE

Član 5.

(Vrsta reprezentacija)

- (1) Sredstva reprezentacije utvrđuju se kao:
 - (a) eksterna reprezentacija za institucije i organizacije iz člana 2. tačka f) i njihove predstavnike i istaknute pojedince,
 - (b) interna reprezentacija za rukovodioca kantonalnih organa uprave i osobe koje on ovlasti.

Član 6.

(Korištenje sredstava reprezentacije)

(1) Rukovodilac kantonalnog organa uprave koristi sredstva reprezentacije razumno i primjereno, vodeći računa o raspoloživim sredstvima za reprezentaciju.

(2) U slučaju da osobe ovlaštene od strane rukovodioca kantonalnog organa uprave za korištenje sredstava reprezentacije prekorače dozvoljeno ograničenje, dužne su dostaviti pismeni izvještaj o prekoračenju, na osnovu kojeg će rukovodilac kantonalnog organa uprave procijeniti da li je prekoračenje opravdano ili je lice dužno nadoknaditi prekoračeni iznos sredstava.

Eksterna reprezentacija

Član 7.

(Korištenje sredstava eksterne reprezentacije)

(1) Korištenje sredstava eksterne reprezentacije mora biti razumno i primjereno, vodeći računa o uslovima i prilikama, te o statusu lica, a može se koristiti u inostranstvu, u samom sjedištu kantonalnog organa uprave i na teritoriji Bosne i Hercegovine.

(2) Korištenje sredstava reprezentacije vrši se putem narudžbenice, koju odobrava rukovoditelj kantonalnog organa uprave. Svaka narudžbenica mora da sadrži naziv davaoca usluge i vrstu i količinu tražene usluge.

(3) Na korištenje sredstava reprezentacije u inostranstvu ima pravo rukovodilac kantonalnog organa uprave i osoba koju on ovlasti.

(4) Pravdanje korištenja sredstava reprezentacije u inostranstvu vrši se bez narudžbenice uz podnošenje pismenog izvještaja uz koji se prilaže odgovarajući računi potpisani od strane korisnika reprezentacije.

Član 8.

(Izvještaj o korištenju sredstava)

(1) Pismeni izvještaj iz člana 7. stav 3. ove Uredbe sadrži datum, mjesto i svrhu korištenja sredstava reprezentacije.

(2) Računi davaoca usluga moraju biti originalni i naknadno odobreni potpisom rukovodioca kantonalnog organa uprave.

(3) U cilju namjenskog trošenja sredstava reprezentacije svaki račun mora u prilogu da sadrži kratak pismeni izvještaj o svrsi korištenja sredstava reprezentacije.

Interna reprezentacija

Član 9.

(Korištenje sredstava interne reprezentacije)

(1) Interna reprezentacija odnosi se na korištenje sredstava reprezentacije za tople napitke i bezalkoholna pića prilikom obavljanja redovnih poslova u kantonalnim organima uprave.

(2) Interna reprezentacija odnosi se i na korištenje sredstava reprezentacije prilikom održavanja kolegija i sjednica Skupštine i Vlade Zeničko-dobojskog kantona, kao i radnih tijela Skupštine.

Član 10.

(Lica sa pravom korištenja sredstava za reprezentaciju)

(1) Pravo na reprezentaciju iz člana 9. stav 1. imaju rukovodilac kantonalnog organa uprave, kao i osobe koje on ovlasti.

(2) Reprezentaciju iz člana 9. stav 2. odobrava predsjedavajući Skupštine, Premijer Kantona ili osoba koju on ovlasti.

DIO IV-PROCEDURE I PRAVILA PRIMANJA I DAVANJA POKLONA

Član 11.

(Primanje poklona)

(1) Kod primanja poklona mora biti jasno utvrđeno da li su oni namijenjeni kantonalnim organima uprave, odnosno nosiocu izvršne funkcije ili njegovom savjetniku.

(2) Kantonalni organ uprave će primiti poklone, neovisno o njihovoj vrijednosti, kada je to u skladu s propisima, sa poslovnim običajima i kada ne postoje neki politički ili ekonomski razlozi zbog kojih ih ne bi trebalo primiti.

(3) Rukovodilac kantonalnog organa uprave ne smije zadržati poklon čija tržišna vrijednost prelazi 100,00 KM, te je isti dužan prijaviti i predati kantonalnom organu uprave u kojem vrši funkciju.

Član 12.

(Primjena Uredbe)

(1) Državnom službeniku i namješteniku nije dozvoljeno primanje poklona od trećih osoba, osim u korist izabranog dužnosnika, nosioca izvršne funkcije i savjetnika, s time da isti moraju znati za primanje poklona.

(2) Takvo lice dužno je pridržavati se odredaba o primanju poklona iz ove uredbe i Zakona o sukobu interesa u organima vlasti u Federaciji Bosne i Hercegovine („Službene novine Federacije BiH“, broj: 70/08).

Član 13.

(Dodjeljivanje poklona)

(1) Kantonalni organ uprave može dodjeljivati poklone institucijama i organizacijama, kao i predstavnicima institucija i organizacija iz člana 2. tačka f. ove Uredbe, prilikom protokolarnih posjeta, u povodu jubileja tih institucija i organizacija, njihovog posebnog doprinosa u razvoju pojedinih oblasti i projekata, te po isteku mandata predstavnicima međunarodnih institucija i organizacija, kao i istaknutim pojedincima, koji su svojim radom i rezultatima rada doprinosili afirmaciji Bosne i Hercegovine, odnosno Kantona.

(2) O davanju poklona u navedenim situacijama, odlučuje rukovodilac kantonalnog organa uprave.

Član 14.
(Vrijednost poklona)

Pokloni za predstavnike institucija i organizacija iz člana 2. tačka f) ove uredbe utvrđuje se u iznosu do 500,00 KM.

DIO V-EVIDENCIJA PRIMLJENIH POKLONA

Član 15.
(Vođenje evidencije primljenih poklona i utvrđivanje vrijednosti)

(1) Kantonalni organi uprave dužni su voditi evidenciju primljenih poklona čija tržišna vrijednost prelazi iznos iz člana 11. stav 3. ove uredbe.

(2) Evidencija primljenih poklona sastoji se od sljedećih rubrika:

- a) redni broj,
- b) podaci o poklonodavcu, potpis poklonoprimca ili lica ovlaštenog za čuvanje poklona,
- c) vrsta, količina i vrijednost poklona,
- d) datum i mjesto prijema poklona,
- e) mjesto gdje se čuva primljeni poklon.

(3) Vrijednost poklona u smislu ovog člana utvrđuje kantonalni organ uprave na osnovu računa, provjerom vrijednosti istog ili sličnog poklona na tržištu ili izjavom poklonodavca koja može biti usmena ili pismena, ali ne i posebno zahtjevana.

(4) Primljeni prirodni pokloni će se knjižiti na isti način kao što se knjiže primljene donacije.

(5) Operativni rad oko primanja, zavođenja, procesuiranja i čuvanja svih narudžbenica, računa i druge prateće dokumentacije u vezi sa reprezentacijom i poklonima, obavljat će računovodstvo kantonalnog organa uprave.

DIO VI-ZAVRŠNE ODREDBE

Član 16.
(Usklađivanje internih akata sa Uredbom)

(1) Kantonalni organi uprave i ostali budžetski korisnici dužni su uskladiti svoje pravilnike o reprezentaciji i poklonima sa ovom uredbom u roku 15 dana od dana stupanja na snagu ove uredbe.

(2) Kantonalni organi uprave i ostali budžetski korisnici koji do dana stupanja na snagu ove uredbe nisu donijeli pravilnike o reprezentaciji i poklonima, dužni su iste donijeti u roku 30 dana od dana stupanja na snagu ove uredbe.

Član 17.
(Stupanje na snagu)

Ova uredba stupa na snagu narednog dana od dana objavljivanja u „Službenim novinama Zeničko-dobojskog kantona“.

Broj: 02-_____/14.
Datum, 08.08.2014. godine
Z e n i c a

PREMIJER

Munib Husejnagić, dipl.ing.maš.

DOSTAVLJENO:

1x Stručna služba Vlade,
1x Svim ministarstvima i drugim tijelima kantonalne uprave,
1x „Službene novine Zeničko-dobojskog kantona“,
1x a/a.